

Jennifer Arends – Reyes

“Mi ta boga pa crea proyecto, cu ta duna e studiantenan un futuro mas sostenibel”

Pa mas di 9 año escolar, Jennifer ta forma parti di Enseñansa na Aruba, formando y guiando nos hobennan pa un mihor futuro. Cu su 30 año, Jennifer Arends-Reyes, casa cu Ricky Arends, ta comparti e mesun profesion como docente na Colegio Arubano. Gran parti di e persona cu Jennifer ta awendia, ta danki na e bon educacion cu el a ricibi di su mayornan, unda cu disciplina, e balornan humano, respet y amor pa prohimo a wordo inculca desde chikito den dje. E nucleo familiar ta algo esencial den desaroyo di un persona y Jennifer ta determina pa trece esey tambe bek den su campaña- y plannan pa cu Gobernacion.

Con bo ta diferencia di e otro candidatonan?

Como un dama profesional mi ta distingui mi mes door di semper mantene mi pasion y energia pa e causanan cu ta mi ta kere aden. Mi ta di un generacion cu ta kere den vision pa futuro y no ta keda mantene e hechonan di pasado den mi presente. Mi ta distingui mi mes como un persona cu ta scucha mi pueblo, pa asina mi ta na altura, unda e necesidad ta. Mi ta kere firmemente den nivel di profesionalismo y dinamismo. Na mes momento, como hende muher, mi ta carga e parti emocional di un ser femenino, cu ta nesecario pa tin un balans den e parti comprensivo pa cu cierto decision.

“Mi ta un hende muher cu caracter y cu ta para pa mi norma y balornan como tambe ta lucha pa un ideal di loke mi kier logra.”

Bo vision ta uno fiabel pa nos comunidad?

Mi vision pa nos comunidad ta, pa ta uno cu structura y cu norma y balornan propio, unda cu cada ken lo sa di trece esaki bek den nos dia diario. Mi ta kere den potencial di nos mesun hendenan y den e producto Aruba, cu innovacion, pero na mes momento, manteniendo loke cu ta haci nos isla asina special; nos cultura y nos hendenan humilde. Un pueblo uni y cu su metanan fiho ta trece estabilidad den un pais.

Durante e 4 añanan anterior e partido na mando a duna un cambio di infraestructura enorme. Kico pa bo ta e siguiente proyecto cu mester tin prioridad pa Gobierno cumpli cu ne?

E prioridad pa Gobierno mester keda e bienestar general di su hendenan. E inversionnan den infraestructura ta di sumo importancia, mirando e balor enorme cu e ta duna bek; reflehando e calidad di bida y vision cu gobierno tin pa su pais y su pueblo.

Como politico mi enfoca ta riba e nivel di educacion, asunto social y hubentud. Mi ta boga pa crea proyecto, cu ta duna e studiantenan un futuro mas sostenibel. Mi



Makiyahe y cabey: **The Stars**
Fotografo: **Jimenez Photography**

ta kere cu ta importante pa trece mas opcion di estudio na nos isla. Aruba su hobennan tin hopi potencial. P'esey mes e guia no mester sosode na scol so, pero na cas y tambe mediante e programanan special, unda cu educacion general di nos hobennan ta ricibi e sosten.

E berdadero lidernan mester ta dispuesto pa sacrifica tur cos pa libertad di su pueblo”, ta un frase celebre di Nelson Mandela. Kico ta bo pensamiento di esaki?

Sacrificio ta algo cu no ta tur hende kier of por haci. P'esey na momento cu bo ta traha pa bo pais y su libertad y progreso, bo mester realisa y acepta tur loke cu ta bin cu ne. Mi ta un hende muher cu ta traha dia y anochi, educando. Cu mesun pasion y dedicacion mi a drenta politica y mi ta sinti mi capacita pa entrega mi experiencia y vision pa un mihor Aruba.

Con e decision di ta un politico awo a cambia bo bida?

Mi ta un persona hopi activo caba y cu politica esaki no a cambia. Mi ta sumamente honra di por ta mas cerca di mi pueblo y mi por bisa cu mi ta sinti mi na cas!